

Communicaziun a las medias dals 15 d'avust 2025

Jobs da stad che fan senn: giuvenils han protegi il gaud da muntogna grischun

45 giuvenils grischuns han passentà ina part da lur vacanzas da stad lavurond en il gaud. En il rom dal Project en favur dal gaud da muntogna èn els s'engaschads sut ina direcziun experta per il mantegniment dal gaud da muntogna: Els han tgirà il gaud giuven ed ils prads maghers multifars ed han cumbatti neofitas invasivas. La BCG sustegna las emnas da project dapi 13 onns.

Il gaud da muntogna protegia da privels natirals, porscha in spazi da viver per animals e plantas e serve a nus umans sco lieu da recreaziun prezios. Quai èn las participantas ed ils participants dal project tranter 15 e 19 onns vegnids a savair directamain al lieu – betg en l'internet u d'in cudesch da scola. Durant lur engaschi da lavur da mintgamai in'emna a Cuira, Küblis e Glion han ils 45 giuvenils gidà cun blera energia: Els han fatg rumidas dal tagl, tgirà prads maghers multifars, tegnì avert pastgiras da lareschs, construi saivs da protecziun cunter la selvaschina e cumbatti plantas estras invasivas. Ils selviculturs dal project als han sustegnì ed instrui. La fundaziun d'utilità publica cun sedia a Trin porscha dapi il 1987 engaschis da lavur en il gaud cun voluntarias e voluntaris per mantegnair e proteger il gaud da muntogna.

Las participantas ed ils participants han già grond plaschair da lavurar en la natira e cun lur mauns. Benjamin Rest, in mat da 15 onns da Panaduz, di: «Igl è stà flot da pudair far insatge cun senn durant mias vacanzas e da perfin survegnir raps per quai. Quest project poss jau be recumandar.»

Per l'engaschi en il gaud durant in'emna han ils giuvenils survegnì mintgamai 500 francs. «Da vesair l'engaschi dals giuvenils per proteger noss gaud da muntogna indigen ans fa mintg'onn puschè grond plaschair», accentuescha Alexander Villiger, il manader dal persunal ed iniziante dal project en favur dal gaud da muntogna da la BCG. Quest onn ha la banca sustegnì il project gia per la 13avla giada.

Contact:

- BCG: Thomas Müller, thom.mueller@gkb.ch, telefon +41 81 256 83 11
- Project en favur dal gaud da muntogna: Prisca Mattanza, pmattanza@bergwaldprojekt.ch, telefon +41 81 650 40 43

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universal moderna – per persunas privatas, l'economia ed il maun public. L'interpresa cun sedia principala a Cuira è represchentada en passa 40 lieus en il Grischun. Cun var 1'000 collavuraturas e collavurats è la BCG ina da las pli grondas patrunas en il chantun. Sia attaschadada al Grischun exprima ella en moda multifara. Ultra da sias activitads economicas s'engascha ella era cun ses sponsoring, ses fonds d'engaschament, sia collecziun d'art e sia lavur voluntara.